

Date – 22/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Home Minister Pu K. Sapdanga chuan halpuah leh halmawi chungchangah, sorkar thupek zawm lote chuan dan an hmachhawn a ngai dawn niin a sawi.**
- 2. Goods and Services Tax (SAT) Council Meeting vawi 50-na ah Mizoram aiawhin Education Minister Dr Vanlalhlana chu a tel.**
- 3. Krismas leh kumthar lo thleng mai tura inpuahchah mek, bazar hmuna mipui pungkhawmah kum dang aain pawikhawihna leh thil bo report a tlem.**
- 4. Chief Minister Pu Lalduhoma chuan mahni kutkawiha eizawna bul tanna, entrepreneurship lamah sang tak thlen tumin Bana Kaih Scheme an tlangzarh thu leh dilna pawh sing chuang a luh tawh thu a sawi.**

<><><>

HOME MINISTER

Home Minister Pu K. Sapdanga chuan halpuah leh halmawi chungchangah, sorkar thupek zawm lote chuan dan an hmachhawn a ngai dawn niin a sawi.

Akashvani News Aizawl zawhna chhangin Pu K. Sapdanga chuan, hun pui krismas leh kum thar 2025 lo thleng tur vuakvetah Mizoram sorkar chuan halpuah leh halmawi a khap tih a sawi nawn a, sokar khapna hi kohhran leh tlawmngai pawl ten an thlawp bawk avangin mipui pawhin an zawm ngei a beisei tih a sawi.

Pu K Sapdanga chuan halpuah leh halmawi hal lo turin mitin a ngen a, halpuah leh halmawi hal chu damlo ten an nat zual phah tih sawiin, an thih hma phah fo thin a ti. Home Minister chuan damlo ten thlamuang taka krismas leh kum thar an lo hman theih nan halpuah leh halmawi hal lo turin mitin a ngen thu a sawi. Halpuah leh halmawi chuan boruak thianghlim a ti chhe thei bawk tih sawiin, Mizoram in boruak thianghlim a neih lai ti chhe zawnga che lo turin mipui a ngen bawk.

<><><>

EDUCATION MINISTER

Goods and Services Tax (SAT) Council Meeting vawi 50-na ah Mizoram aiawhin Education Minister Dr Vanlalhlana chu a tel.

Nimin khan sorkar laipua Finance Minister Pi Nirmala Sitharaman kaihhruaina in Marriot Hotel Ball Room, Jaisalmer, Rajasthan-ah hun hman

niin, nimin vek hian Finance Minister ten pre-budget discussion meeting an lo nei tawh bawk a ni.

Education Minister Dr Vanlalhlana hi Commissioner of Tax Pu R. Zosiamliana, Addl Commissioner of Tax Pu HK Lalhawnghiana ten an tawiawm a ni.



CM AT NEC PLENARY SESSION

Chief Minister Pu Lalduhoma chuan mahni kutkawiha eizawna bul tanna, entrepreneurship lamah sang tak thlen tumin Bana Kaih Scheme an tlangzarh thu leh dilna pawh sing chuang a luh tawh thu a sawi.

Nimina Agartala, Tripura-a NEC Plenary Session wawi 72-naah he thu hi sawiin Chief Minister chuan Viksit Bharat 2047 tihhlawhtlin nan leh DoNER Ministry hmalakna tihlawhtling zual turin Mizoram sawrkar chuan khawvel huapa hmasawna ruhrel tha nena thum Industrial Zone din an duh tih a sawi a. Kum reiloteah sustainable development goals leh thalaite tana hna siam belh lamah an than chhoh ngei a rin thu a sawi a. Prime Minister Pu Narendra Modi-an hmarchhak bialte chu India ram ei leh bar dinhmun tisang thei tur, economic powerhouse ni thei khawp hiala theihna nei an ni tia a lo sawi tawh angin hmarchhak bialah hmasawna chak taka kalpui turin remna leh muanna boruak tha tak siam a ngai a ti a, theihtawp chhuah turin state tin aiawha kalkhawm te a sawm a ni.

Chief Minister chuan DoNER Ministry kal tlanga project thehluh kalkawng thui leh rei lutuk chu awlsam zawka kalpui dan dap ni se a duh thu a sawi a. Zaa 10 GBS chu awmze nei leh tam zawk an hman theih nan DoNER in Finance Ministry nena hma lain state sum indaih lohna laia project lian leh rotling thawh nana hman turin ruahman se a duh thu a sawi a. Ram mipui tam ber te inngahna Agriculture lama hmasawna a thlen theih nan Ministry of Jal Shakti hnuaiia Command Area Development Programme funding pattern chu 50:50 ni lovin 90:10 ni thei se a duh thu bakah thil pawimawh dang te a thlen a ni.



AIZAWL SMART CITY CEO

Aizawl Smart City Limited Chief Executive Officer Pu CC Lalchhuangkima'n Multi Utility Pole Project kaltlanga Aizawl Khawpui tlangdung (Bawngkawn atanga Kulikawn) kawng an electric hrui leh hrui dangte felfai zawka zam fel a nih theih nan hmalakna chak taka thawh mek a nih thu a sawi.

Akashvani Aizawl News in a kawmna ah he thu hi sawiin Aizawl Smart City CEO chuan Project atan ban thar phun zawh ni tawhin Electric hrui pawh thlun fel a ni tawh a ti a, hrui dang thlun fel hna thawh a nih theihna turin Cable Operator, Internet Service Provider-te leh hrui thlun that ngai zawng zawngte chu hun thiam chungin kaihhruaina zawma an cable-te thlung tha turin thuchhuah an lo siam tawh tih sawiin hna an tan hma thla 3 ah hriattirna an ti chhuak a ti a, hun pek chungin ISP-te'n cable an sawn mumal loh avangin cheh chah a ni a, hei vang hian mimal bakah sumdawng, banking, Gpay service, bill pek na, Company, GST lamten Internet signal nei tha loin, harsatna an tawh tih an sawi.

BYTE....SMART CITY CEO

Pu CC Lalchhuangkima sawi danin an hnathawh chu chak taka kalpui mek anih thu sawiin Zarkawt leh Kulikawn inkar chu December thla chhunga zawhfel hman an in beisei a ti a. Zarkawt atanga Bawnkawn erawh hunpui zawh lam nakum February thla ral hmaa zawh hman an beisei tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnu dar 2 leh a chanve-ah Chanchinthar puan leh a ni ang.

<><><>

CHRISTMAS PREPARATIONS

Krismas leh kumthar lo thleng mai tura inpuahchah mek, bazar hmuna mipui pungkhawmah kum dang aiin pawikhawihna leh thil bo report a tlem.

New Market Beat Police Duty-ten Akashvani palai an hrilh danin kum dang zawng aiin kumin hian pawikhawihna leh thil bo report an dawng tlem tih an sawi a. Tun kar chhung pawhin thil bo report an dawn loh thu an sawi bawk a ni.

Krismas leh Kumthar lo thleng tur lawm turin mipuite an inpuahchah mek a, Aizawl Bazarpu pawh a ni telin a lun chho mek a. Ni tlem te chiah Krismas lo thleng tur atana inpuahchahna hun a awm tawh karah bazara sumdawngte chuan kumin bikah naupang school an chawlh har deuh avang te, online bazar leh shopping mall dangte a awm thluah tawh avangin kum dang angin bazar a lun lutuk lo nia an hriat thu Akashvani an hrilh a. An thil zawrhte pawh kum dang aia an la hralh tam rih loh thu sawiin, sum lengvak mipuia a tlem hrim hrim nia an hriat thu an sawi a ni.

Krismas leh kumthar mahni khaw lama hmang tura haw pawh an thahnem tawh hle a, Aizawlah chuan zingkarah pawh lirthei chhuak a tam tawh bakah hmun thenkhatah phei chuan traffic-te a jam a ni. Krismas lo thleng tur hmuakin mipuite kawng hrang hrangin an inbuatsaih tih Akashvani palai C. Lalthansangi chuan a sawi.

VC OF C. LALTHANSANGI, NEWS CORRESPONDENT, AKASHVANI AIZAWL

<><><>

REFUGEE AID

Mizorama tlawmngai pawl lian ber Central YMA chuan nimin khan Mizorama raltlan Aizawl District chhunga awm mek te hnenah Krismas pualin tanpuina thilpek an hlan.

Tanpuina thilpek hi nimin khan Central YMA Pisa, Tuikhuahtlang, kawtah Central YMA President Lalmachhuana'n a vailiam a, thilpek zawng zawng hlutzawng hi cheng nuai 4 a ni.

Central YMA President hian Zohnahthlak unau ten saham nana Mizoram an awm chhungin mahni awmna theuhah Mizo nun ze mawi hrang

hrang nunpui a, ram leilung fate khawsak phung baka tumah khawsa bik lo turin raltlan camp hrang hrang aiawh te chu a chah a ni.

Central YMA hian BSUP Edenthlar leh RAY hmuna Manipur raltlan awm te leh YHAI, Leitan, Sairang camp, Sihmui 1 leh 2 bakah Tuirual-a Myanmar raltlan awm mek te tan thilpek hi a hlan a, a vai hian buhfai bag 125, tel case 45 leh Dal bag 16 bakah Nutrela bag 22 a ni.

<><><>